

ATV/UTV: Un problema persistente

Entre tanto cu ta hiba e discusion tocante cambio di maneho pa UTV/ATV, kico precies ta e motivacion tras di esaki?

Pa algun aña caba, ambientalista ta bati alarma tocante e daño cu e vehiculonan aki ta causa na naturalesa. Entre otro door di directamente trapa riba animal y mata, pero tambe door di perturba e

suelo natural causando entre otro, erosion.

Den su articulo april ultimo, titula "Aruba's Visitors Are Loving The Island To Death," Forbes a nota cu "riba un dia normal, centenares di vehiculo ta core riba e camindanan di santo cerca di beach y lantando stof. Ambientalistanan ta luchando pa protege e simbolo nacional stima di Aruba, e Shoco

chikito, y Terns, di haya nan neishi destrui pa ATVs." E articulo ta cita experto di parha, Michiel Oversteegen, bisando cu "cada aña nan ta core riba e sitionan di neishi y mata centenares di parha recién naci."

Ademas di e daño directo na naturalesa, e vehiculonan aki tambe ta causa molester pa local y turista. Entre otro,



a keha di e zonido y stof, pero tambe di e manera con e vehiculonan aki ta core irresponsablemente riba caminda. Tambe tin cantidad

di accidente cu e vehiculonan aki, por ehemplo juni ultimo, unda dos turista a accidenta (riba potret).

Esaki a pone ciudadanonan exige un solucion urgente pa e vehiculonan aki. Sinembargo, pa nos bishitantenan e excursion cu ATV/UTV ta keda uno emocionante y popular, y pues interesnan economico ta preveni un solucion mas rapido.

Marisol Tromp (MAS):

Kico exactamente moratorio riba UTV/ATV ta encera?

Mediante un carta fecha 2 di september 2024, lider di fraccion MAS den Parlamento, Marisol Tromp a dirigi 15 pregunta na minister di Transporte, Ursell Arends, hunto cu prome minister Evelyn Wever-Croes y minister di Finanzas, Xiomara Maduro, relaciona cu e maneho pa ATV/UTV.

Riba su rednan social, Tromp a post e carta cu el a manda y a splica su motivacion, bisando cu for di "basta aña pasa caba, Gobierno y Minister di Infraestructura Evelyn Wever Croes a ricibi conseho extenso di un comision encabeza pa DOW y cu participacion y cu experticio di varios departamento di Gobierno riba con pa para of minimalisa e destruccion di nos naturalesa, e peligro riba caminda publico, y e molester cu e filanan di UTV/ATV ta ocasionando pa años caba aki na Aruba," el a skirbi. "E consehonan aki a jeg'i wordo poni ter inzage den un reunion publico na Parlamento."

E preguntanan cu a dirigi na Minister di Transporte, Ursell Arends ta:

1. Minister a anuncia den pasado cu lo introduci un moratorio riba importacion di e vehiculonan ATV/UTV na Aruba. Esaki realmente a tuma lugar of a wordo ehecuto?
2. Si e contesta na pregunta nr. 1 ta positivo, Minister por describi kico exactamente e moratorio riba UTV/ATV ta encera?
3. Si e contesta riba pregunta nr. 1 ta afirmativo, con a implementa e moratorio aki y desde ki fecha?
4. Cuanto aña e comision interdepartamental di Gobierno a traha riba e conseho(nan)?
5. Cual ta tur e departamentonan cu a participa den e

comision(nan)?

Na prome minister, Evelyn Wever-Croes, a dirigi e siguiente pregunta:

6. For di aña 2021 Minister President a ricibi conseho comprobando cu e UTV/ATVnan ta forma un peligro real riba nos careteranan publico, pasobra nan no ta disena pa core riba carretera di asfalt. Aparentemente Aruba ta e unico pais cu ta permiti esaki. Minister por entrega e proposicion pa rutanen alternativa pa UTV/ATV na Parlamento?

7. Dicon Gobierno nunca a implementa esaki, siendo cu for di como 4 aña pasa ya esaki wordo sugeri?

8. Practicamente tur dia tin accident cu UTV/ATV riba nos isla, un mas grave cu otro, pa un gran parti cu turistanen involvi. DTI ta logra controla di tur e vehiculonan aki si nan ta cumpli cu tur exigencia di un keuring prome cu nan subi caminda?

9. Minister por comparti e relatonan di DTI cu Staten caminda ta ilustra cuanto di e UTV/ATVnan anualmente a wordo goedgekeurd den e ultimo 3 aña?

10. Con por ta posibel cu Gobierno pa años ta sigui permiti destruccion continuo y diario di naturalesa (mata y bestia) den cierto areanan di Aruba, ocasiona pa e filanan continuo y diario di centenares di e vehiculonan di ATV/UTV?

11. Claramente Adventure Tourism ta wordo propaga tambe door di e stakeholders den turismo, ya cu e turistanan lo ta gusta esaki. Minister no ta haya contradictorio cu ta permiti destruccion di naturalesa deliberadamente, door di un banda haci promocion/propaganda pa Adventure Tourism cu ATV/UTV y alabes keda sin introduci rutanen alternativa pa e tours aki?

A dirigi dos pregunta tambe na minister di Finanzas, Xiomara Maduro:

12. Cuanto ATV/UTV a wordo importa na aña 2021, 2022 y 2023?

13. Recientemente por a tuma nota cu e compania All To Car a anuncia cu nan a importa ATV/UTV electrico nobo na Aruba y a bisa cu lo no tin molester di zonido mas den barionan. Pakico Gobierno a permiti importacion di e vehiculonan aki cu lo sigui destrui naturalesa su mata y bestianan, ya cu Gobierno te cu awe no a introduci ningun ruta alternativo?

Finalmente, Tromp ta cera e carta cu dos pregunta mas na prome minister:

14. Ki dia Ministernan Wever-Croes, Arends y [minister di Husticia, Rocco] Tjon ta papia un solo idioma pa cu e topico di UTV/ATV pa cu nan responsabilidnan ministerial riba e tema aki?

15. Unda e 'eenheid van beleid' ta den conseho di Minister pa cu e tema di e peligrosnan riba caminda, molester den barionan residencial y destruccion di naturalesa?

Moratorio riba ATV/UTV

Na januari 2022, gobierno di Aruba a anuncia cu prome minister hunto cu minister Arends tabatin un reunion cu e comision institui pa prome minister un aña prome, pa atende e problema di UTV/ATV. Den e reunion aki, e comision a propone pa regula e mercado y busca un balans entre desaroyo economico y turistico, teniendo cuenta cu medio ambiente.

Durante e reunion a tuma dos decision:

- (1) Lo introduci legislacion pa stop importacion di e vehiculonan pa un tempo y
- (2) Lo bin cu un moratorio riba dunamento di permiso, pa trece poco tranquilidad den

e mercado na Aruba. Mientrastanto ta sigui traha pa bin cu un ruta alternativo pa uso di e UTV/ATVnan. Banda di esaki ta calculando kico ta e maximo cu Aruba por carga di e vehiculonan aki.

Despues, na juli di 2022, prome minister a anuncia cu "ta trahando riba rutanen alternativo cu ta den fasenan hopi avansa caba y tambe ta trahando riba e diferente leyman cu mester bin." Prome Minister a resumi bisando cu e trabaonan ta avansando cu e diferente departamentonan, y prome siman di juli lo cuminsa ricibi e rutanen alternativo, tambe con e leyman ta wordo hinca den otro pa por regula e sector aki miho. E meta ta pa sigura cu e sector aki por sigui opera na un forma sigur pa tur hende, respetando naturalesa y brindando e servicio/actividad na turistanan.

Dia 9 di augustus ultimo, minister di Transporte a traves di un comunicado di prensa a bolbe menciona e plannan pa e maneho nobo pa UTV/ATV, pero no tabata muestra di tin hopi avance. "Ya pa varios aña ta purbando di yega na un miho balans entre turismo aventurero y proteccion di naturalesa. E uso di UTVs y ATVs a trece un aumento di accidentenan cu daño fisico y material, daño na nos naturalesa (flora,

fauna y propiedadnan geomorfologicos), disturbio pa ciudadanonan (zonido y stof) y obstaculizacion di e fluho di trafico," a bisa den un comunicado di prensa.

"Gobierno di Aruba a instala un comision multidisciplinario y un taskforce pa controla cumplimiento di ley y reglamento relaciona cu vehiculonan di motor cu ta usa pa huur.

A reduci caravana na solamente 10 vehiculo, pero esaki no ta suficiente," e comunicado ta reconoce.

A informa cu Ministerio di Naturalesa y Transporte ta hiba un maneho di regula y reduci e permisonan pa opera e vehiculonan UTV y ATV den transporte publico. A base di consehonan ricibi di Directie Natuur en Milieu y Departamento di Transporte Publico, den cooperacion cu e instancianan cu a forma parti di e comision di conseho, lo introduci diferente cambio, entre nan rutanen alternativo pa UTV y ATV den transporte publico, pa minimalisa e disturbio den nos naturalesa." Pues ta duna di compronde cu introduccion di rutanen alternativo, y cualkier otro cambio den esaki, ainda ta keda pa futuro.



Presidente di Parlamento di Aruba
Sr. mr. Edgard Vrolijk
L.G. Smith Boulevard 72
Aruba

Oranjestad, 02 di september 2024

Apreciabel sr. Vrolijk,

Pa medio di e carta aki suscrito kier pidi sr. Presidente pa dirigi e siguiente 15 preguntanan na MinTINO sr. Ursell Arends, na MinPres sr. mr. Evelyn C. Wever-Croes y na MinFC sr. mr. Xiomara Maduro. Suscrito ta desea di haya contesta por escrito riba tur su preguntanan a corto plazo.

Gradiciendo bo persona di antemano pa boso disponibilidad y colaboracion.

Atentamente,


sra. drs. Marisol Tromp
Lider di Fraccion M.A.S.

